



Anna Maria Brughitta, sa Poetessa de Gésturi

Anna Maria Brughitta est nàscia in Gésturi su 12 de Abrili de su 1962, e pesada ingunis etotu. Sa bidda pitichedda a is peas de sa pranedda de sa Giara, arrica de paulis e de matas de ciurexu incruadas de su bentu estu, e famada po is cuadeddus arestis chi tenint is ogus a forma de méndula únicus in totu su mundu, est sa matessi bidda aundi est nàsciu fintzas su Biadu Nicola, Fradi Capucinu.

Anna Maria, pustis de ai pigau su Diploma a s'Istitutu Magistrali Istatali de Santuéngiu, at cumenzau luegus a fai sa maista de iscola; a pustis at trabballau cument'e Assistenti Amministrativa in sa Asl, ma at lassau su trabballu po si dedicai a sa famíllia. Amantiosa de sa natura, tenit unas cantu passionis, de sa coxina a s'arti; Vice Presidenti de s'Assótzziu "Artis e Fainas", est artista issa etotu, ca iscrafedat e creat inconas in folla de òru, ma pruscatotu est amantiosa de iscritura, e difatis fait parti de s' "Assótzziu Culturali Alessandra Sorcinelli". Est fintzas impinniada in s'amparu de is deretus sotzialis, e agiudat in su tzentru contras a sa violéntzia "Luna e Sole Onlus" de Casteddu.

Iscriit poesias, aforismus e pentzus giai de candu fiat piciochedda, ma est de pagu isceti chi at isce-

berau de ddus pubbricai: “Anime vaganti”, de su 2019, est sa primmu òbera sua, una regorta de poesias aundi at postu is sentidus prus fungudus chi tenit in su coru.



At partetzipau a leturas poéticas e bintu unus cantu cuncursus literàrius, de poesia e de prosa, e est intrada cuatru bortas de sighida in sa finali de su Prémium Wilde. Ddi ant donau unu muntoni de riconoscimentus, cument'e su “Títulu Académicu In Honoris Càusa” in Arti, chi ddi at donau s'Académia Internatzionali de is Isciéntzias Naturalis, po sa poesia “Anime vaganti”. Is òberas suas s'agatant in unas cantu Antologias Poéticas, de Versus e fintzas in s'Antologia Poética tradúsia in Esperantu e in sa “Encyclopedia of poets and writers from around the world 2021 - World Literature Academy - Enciclopedia di Poeti e Scrittori da tutto il mondo 2021 - Accademia di letteratura mondiale”.

At pubbricau sa regorta poética “Nel buio della notte” chi s'agatat in s'antologia “Versi di Sardegna” (Tomarchio Editore).

Nosu de s'Ufítziu Língua Sarda de Gésturi, de su progetu “Sa Marmidda chistionat in Sardu”, eus atobiau a Anna Maria Brughitta po ddi pregontai càncua cosa in prus in pitzus de is atividadis cosa sua. A sighiri, su pregontu chi ddi eus fatu.

Saludi Anna Maria, e beni agatada. Cumentzau luegus fueddendi de “Anime Vaganti”, su primmu líbburu chi as iscritu, una bella regorta de poesias: candu est nàscia custa passioni po sa Poesia? Candu ddas as iscritas?

Sa passioni mia po sa poesia est nàscia candu fia pipiedda, gràtzias a is maistas chi apu tentu in iscola a is elementaris, chi m'ant fatu apretziai sa letura e pruscatotu custa arti. Iscriu de tempus meda: apu cumentzau cun pentzus piticheddus, giai de piciochedda, ma est isceti pustis de sa morti de fillu miu, acuntéssia totuinduna candu teniat 5 annus e mesu, chi mi seu atacada a s'iscritura, chi est sa cosa chi m'at salvau. De insaras is poesias funt sighias, una avatu de s'àtera, finas a oi.

Fillu miu, Giacomo, m'at donau sa fortza de andai a innantis, m'at ghiau cara a cussu ràgiu de soli chi circaus totus. E si oi sèu innoi a ndi fueddai ddu depu a issu. In custu líbburu ddoi at una poesia chi fait parti de unu tretu de sa vida mia de importu e diftziili meda, dedicata a issu, chi tenit a tí-tulu “Giacomo il mio piccolo angelo”, chi si podit agatai fintzas in youtube.

In is poesias ammostas s'ànima tua, su chi tenis in su coru e totu is sentidus, siat is prus alirgus, siat is prus tristus: cantu est difitzili a s'aberri diaci a is ogus de is àterus?

Iscriu po passioni, e sa poesia no est àteru chi su mesu chi su coru impreat po comunicai totu is sentidus, poita est cun su coru isceti chi si podit trasmiti s'Amori. Apu sèmpiri preferiu espressai is pentzus mius cun sa pinna... in su follu arvu apressit totu. No est sèmpiri fàtzili, a s'aberri a is àterus, poita meda bortas t'ispollas de su chi tenis aintru. Non funt totus, is poesias ispiradas a càncua cosa o a calincunu: a bortas funt frutu de s'immaginatzioni manna chi tèngiu, sa visioni romàntica mia, o fortzis s'illusioni chi sa vida siat diaci.

Sa poesia est libbertadi, bisu... fantàsia, e no àtera cosa. In custu líbburu no apu sighiu unu tema isceti, poita apu bófiu fai a cumprèndi ca candu unu iscriit podit arroliai in totu is chistionis de sa vida chene bregúngia e làcana peruna. Su líbburu miu, difatis, arregollit versus ispiraus a sa lebiesa de s'Amori in totu is formas suas, romànticu, sentimentosu, eròticu... ma fintzas delusioni, amigàntzia, ispera, amori po sa natura, po su mari, amori po sèi etotu... Circu de fai lompi custas imàginis e custus sentidus deretus a su coru de is chi ddus ligint.

Is versus tuus si ispirant fintzas a sa bidde e a sa terra tua: cantu est forti custu líongiu cun su logu aundi ses nàscia e aundi bivis?

Dèu seu nàscia e crèscia in custa bidde pitica ma bellixedda. Is arréxinis mias funt innoi giai de unas cantu generatzionis, e a ddoi bivi po mei est sa cosa mellus. Est in is personis de Gésturi, cun sa franchesa e sa bonesa insoru, chi si podit agatai sa Sardigna verdadera.

Mancai càncua poesia de is chi ddoi funt in su líbburu fueddit de acuntéssius tristus de sa vida cosa tua, nci arrennescis sèmpiri a donai unu messàgiu de ispera, a ispainai sentidus bonus e positivus. A su parri cosa tua, custa manera de iscriiri podit èssiri fintzas de agiudu po àterus chi funt sunfrendi?

Prima de pubbricai custu líbburu nemus isciiat ca dèu iscriia. Iscriia in is momentus de solidadi, fiat su mundu miu... dèu iscriu pruscatotu a su noti, candu su siléntziu agiudat a si lassai andai! Est de cancu annu fait isceti chi custa passioni mia, custu bisu serrau in unu calàsciu, ndi est essia a pillu. Su miu est istétiu un'acrescimentu personali, una segunda possibilitadi, una segunda giovunesa. Una pigada de cuscéntzia, ca sa vida tocat bívia istimendi prima a nosu etotu e pustis a is àterus: isceti aici poedeus fai a manera chi is àterus s'istimint. Custa seu dèu, una chi de totu is suferéntzias est arrenéscia a imparai. Is esperiéntzias chi m'ant portau a èssiri su chi seu immoi, úmili e sintzilla, sentzera, una persona chi no s'arrendit a is dolori e is dispraxeris, m'ant forgiau, m'ant portau a mi castiai aintru, e apu cumprèndiu ca sa vida sínniat e donat a imparai, e tocat a non si pran-gi asuba. A is dispraxéris, a is malis e a is doloris, ddus bincit s'Amori.

Càncua poesia diventat unu modu de narri asuba de sa vida: una de custas, "Il faro", est s'isprigu de s'empatia mia, ca seu sèmpiri pronta a agiudai is àterus. Una personi de fidútzia cument'e su faru a de noti in mesu de su mari, ca is marineris si fidant de issu in is momentus bellus ma pruscatotu in cussus prus difitzilis. In un'àtera poesia "La speranza", fueddu de su chi àteru no est chi no unu motori, chi no si biit ma s'agiudat a cumbati, si fait bisai, arruiri, si ndi fait torrai a pesai, a abetai e... a tirai a innantis. Cument' apu circau de fai dèu etotu, cun totu is difficultadis chi apu dépiu afrontai.

De pagu as arriciu unu riconoscimentu de importu mannu, ca sa poesia tua "Il Beato Fra' Nicola da Gesturi" dda ant posta in unu líbburu po su Paba: ti ddu abetàs? Ita as provau candu ddu as iscí-piu?

Partetzipaus a is cuncursus isciendi ca ddoi at a èssiri unu muntoni de poesias chi ant a esaminai. Pagu tempus fait ia mandau sa poesia "Il Beato Fra Nicola da Gesturi", chi apu amau luegus po su chi rapresentat, ma mi ndi fia povinas iscaréscia, de ai partetzipau a cussu cuncursu. Mai mi ddu ia a èssiri abetada chi su líbburu cun sa poesia mia ddu iant a ai donau a Paba Frantziscu! Candu est lómpia sa Pergamena cun su Diploma de Onori apu provau unu prexu mannu meda, chi no si podit ispricai.

Iscieus chi fais voluntariau e ses sèmpiri disponíbbili a agiudai is àterus. Nosi contas càncua cosa de su chi fais?

Apu iscritu una poesia chi s'agatat in su líbburu, "Dai voce al tuo silenzio", po s'incingiadura de su tzentru contras a sa violéntzia "Luna e Sole Onlus" de Casteddu aundi seu sòtzia, e sa presidenti est Marinella Canu. Custa poesia est diventada su Manifestu de s'Assótzziu: una poesia chi agiudat is personis vítimas de aprofitamentu a cumprendi ca dónniunu tenit unu valori... e ca is chi tenit bisóngiu non funt a solus, ca nosu ddoi seus! Apu sèmpiri circau de donai una manu, mancai cun unu fueddu isceti, a chini teniat bisóngiu.

Cali progetus tenis po su benidori? Giai iscriendi un'àteru líbburu, ses?

Pustis de custu primítziu apu pubbricau una regorta poética, "Nel buio della notte", chi fait parti de sa Antologia poética "Versi di Sardegna" (Tomarchio Editore), cun s'agiudu de sa Dotora Alessandra Sorcinelli. Cali progetus téngiu po su benidori? Poesias ndi tèngiu medas, seguru chi apu a pubbricai cancu àteru líbburu; ma pentzu puru chi, una borta o s'àtera, ia a bolli provai a iscriri povinas unu romanzu: custu est su bisu chi tèngiu po su benidori.

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.